

MALAKOFF

A Member of  **MMC Group**

TEKS UCAPAN OLEH

**ENCIK HABIB HUSIN
TIMBALAN PRESIDEN EKSEKUTIF, OPERASI
MALAKOFF CORPORATION BERHAD**

**SEMPENA
MAJLIS JAMUAN MAKAN MALAM
KARNIVAL SUKAN MALAKOFF 2016**

Para Pengurusan Kanan Malakoff Corporation Berhad,

Pengurus-Pengurus Stesen,

Tuan-tuan dan Puan-puan sekalian,

Assalamualaikum Warahmatullahi Wabarakatuh.

Saya bagi pihak pengurusan Malakoff Corporation Berhad, mengucapkan selamat datang ke Majlis Jamuan Makan Malam Tahunan Karnival Sukan Malakoff bagi tahun 2016. Saya amat berbesar hati kerana dapat bersama-sama anda, meraikan peserta-peserta Karnival Sukan Malakoff dan penerima-penerima “Long Term Service Award” pada tahun ini.

Tuan-tuan dan Puan-puan,

Karnival Sukan Malakoff merupakan salah satu inisiatif syarikat untuk mengeratkan silaturrahim antara semua warga kerja Malakoff. Karnival Sukan pada tahun ini disertai oleh enam pasukan daripada KLHQ, Tanjung Bin Power, Tanjung Bin Energy, Prai Power, Port Dickson Power, dan Lumut Power Plant di mana ianya mewakili setiap kawasan operasi Malakoff di seluruh Semenanjung Malaysia.

Saya difahamkan bahawa karnival sukan merupakan acara yang paling dinanti-nantikan oleh warga kerja Malakoff setiap tahun. Sambutan terhadap karnival ini juga semakin meningkat dan para peserta menjadi semakin kompetitif di dalam acara sukan masing-masing. Pada tahun ini sahaja, seramai 325 orang peserta telah mengambil bahagian dalam sepuluh acara sukan yang dipertandingkan iaitu bola sepak, futsal, boling, *dart*, ping pong, tennis, badminton, *carrom*, sepak takraw dan bola tampar.

Tuan-tuan dan Puan-puan,

Matlamat kita agar karnival sukan sebegini dapat menyatukan warga kerja Malakoff dalam suasana yang lebih santai sambil beriadah. Sifat kompetitif dan positif untuk berjaya dalam setiap acara sukan pasti dapat menggalakkan pembentukan warga kerja yang sentiasa sedia berkhidmat secara efektif dan profesional. Karnival sukan ini juga merupakan satu wadah yang mendukung matlamat syarikat untuk melahirkan warga kerja yang cergas, aktif, berdisiplin, berdaya maju dan berdaya tahan.

Ini bersesuaian dengan nilai-nilai korporat Malakoff yang menekankan kepada integriti, semangat berpasukan, inovasi, kecemerlangan dan sikap saling hormat menghormati antara satu sama lain.

Tuan-tuan dan Puan-puan sekalian,

Pada malam ini, kita sekali lagi akan meraikan warga kerja yang telah berkhidmat selama 20, 15 dan 10 tahun di Malakoff. **Long Term Service Award** atau LTSA yang disampaikan kepada mereka, merupakan satu bentuk penghargaan dan insentif terhadap jasa dan bakti yang telah mereka curahkan kepada syarikat sepanjang tempoh perkhidmatan mereka.

Tahun ini, seramai 48 orang akan menerima anugerah 20 tahun, 24 orang menerima anugerah 15 tahun, dan 13 orang menerima anugerah 10 tahun.

Bagi pihak pengurusan syarikat, saya ingin merakamkan setinggi-tinggi terima kasih kepada penerima-penerima LTSA di atas pengorbanan dan sumbangan yang telah mereka berikan kepada Malakoff selama ini.

Semoga penganugerahan ini juga menjadi pembakar semangat bagi rakan-rakan sekerja yang lain untuk terus berkhidmat dengan Malakoff dan bekerja bersungguh-sungguh demi kebaikan syarikat dan semua warga kerjanya.

Tuan-tuan dan Puan-puan,

Adat bertanding, pasti ada yang menang dan ada yang kalah. Kepada yang menang, tahniah dan teruskan kecemerlangan anda. Kepada yang kurang bernasib baik, ayuh bangkit dan jangan mudah mengalah. Tingkatkan usaha anda dan cuba lagi di tahun yang akan datang.

Insyallah, bagi tahun 2017, Karnival Sukan Malakoff akan diadakan di Port Dickson, Negeri Sembilan. Teruskan momentum dan rutin latihan anda sebagai persediaan untuk berentap sekali lagi di tahun hadapan.

Tuan-tuan dan Puan-puan,

Di sini, saya juga ingin mengucapkan ribuan terima kasih kepada semua yang telah bertungkus lumus demi menjayakan karnival tahunan ini, terutama sekali kepada jawatankuasa penganjur dan *Chef De Mission* setiap pasukan yang telah berusaha demi memastikan karnival ini berjalan dengan lancar.

Akhir kata, syabas dan tahniah diucapkan kepada semua peserta Karnival Sukan Malakoff dan penerima LTSA tahun 2016.

Semoga kita bersua lagi dalam Karnival Sukan Malakoff di Port Dickson tahun hadapan!

Wassalamualaikum Warahmatullahi Wabarakatuh.

Sekian, terima kasih.